



Հանրապետական մանկավարժահոգեբանական կենտրոն

«Հանրակրթական դպրոցների ուսուցիչների և ուսուցչի օգնականի
դասավանդման հմտությունների զարգացման
ապահովում» ծրագիր

ՀԵՏԱԶՈՏԱԿԱՆ ԱՇԽԱՏԱՆՔ

Դպրոց՝ «Նոյեմբերյանի թիվ 2 հիմնական դպրոց» ՊՈԱԿ

Թեմա՝ «Բուլինգի դրսևորումները և կանխարգելումը դպրոցում»

Մենթոր՝ Նաիրա Անանյան

Կատարող՝ Ռիմա Պապիկյան

Բովանդակություն

1. Ներածություն-----	3
2. Բուլինգի սահմանումները և տեսակները -----	5
2.1 Ի՞նչ է բուլինգը	
2.2 Բուլինգի տեսակները	
3. Բուլինգի իրավական կարգավորումները ՀայաստանումԿարգավորման և կանխարգելման միջազգային փորձերը-----	8
4. Հոգեբանական բուլինգի դրսևորումը միջին դպրոցում-----	10
4.1 Հոգեբանական բուլինգն աշակերտ-աշակերտ փոխհարաբերություններում: Բռնարար և զոհ	
4.2 Բուլինգի օրինակներ սեփական փորձառությունից	
4.3 Հոգեբանական բուլինգն ուսուցիչ-աշակերտ փոխհարաբերություններում	
4.4 Ի՞նչ դեր ունի ծնողը բուլինգի գործընթացում	
5.Գործնական մաս-----	20
5.1 Չրույցի մեթոդ: Հոգեբանական թեստ	
6.Եզրակացություն-----	27
7.Գրականություն-----	29

Ներածություն

<< Ձեր երեխային կուռք մի դարձրեք. երբ մեծանա, զոհեր կպահանջի>>:

Պ.Բուլաստ

Մարդու արժանապատվության և իրավունքների նկատմամբ հարգանքը, հոգատարությունը նրա բարօրության, համակողմանի զարգացման, հասարակական կյանքի նպաստավոր պայմանների ստեղծման նկատմամբ անվանում են մարդասիրություն: Մարդասիրությանը, սակայն, հակադրվում է մի երևույթ, որն իրենից ենթադրում է ֆիզիկական կամ հոգեբանական ուժի գործադրում այլ անձի նկատմամբ՝ բուլինգ (անգլ. Bullying):

Բուլինգն անցանկալի , հոգեբանական, ֆիզիկական կամ էմոցիոնալ սահմանների խախտմամբ ագրեսիվ վարքն է դպրոցահասակ երեխաների շրջանում, որը ներառում է ուժերի անհամաչափություն,կրկնվող է կամ ունի կրկնման պոտենցիալ:

Այս դատապարտելի երևույթն այսօր բավականին արդիական է դարձել և հայտնվել է բոլորի ուշադրության կենտրոնում: Ըստ ՅՈՒՆԻՍԵՖ-ի վերջին զեկույցների՝ աշխարհում 13-ից 15 տարեկան աշակերտների կեսը՝ շուրջ 150մլն երեխա, դպրոցում իր հասակակիցների կողմից ենթարկվել է բռնության: ՅՈՒՆԻՍԵՖ-ը երեխայի իրավունքների գծով համաշխարհային առաջատարն է, որի գործունեության նպատակն է յուրաքանչյուր երեխայի համար ամենուրեք ապահովել հավասար հնարավորություններ՝ հատուկ ուշադրություն դարձնելով ամենակարիքավոր երեխաներին: Երեխաների դեմ բռնությանը վերջ դնելու համար հիմնադրամը կառավարություններին կոչ է անում միանալ <<Ոգեշնչե՛նք>> (INSPIRE) անունը կրող օրակարգին, որն իրենից ենթադրում է վերջ դնել երեխաների նկատմամբ բռնությանը:Բուլինգը՝ որպես ֆիզիկական և հոգեբանական բռնության ձև , հայտնվել է ոչ միայն հոգեբանների,մարդու իրավունքների պաշտպանությամբ զբաղվողների ուշադրության կենտրոնում,այլև իր արտացոլումն է գտել ժամանակակից գրականության մեջ, ֆիլմերում: Օրինակ՝ Ս.Քինգի <<Քերրի>> գրքում համեստ և զուսպ աշակերտուհին, հոգնելով իր նկատմամբ կատարված բռնությունից,սկսում է դաժանորեն վրեժխնդիր լինել դասընկերներից:Այս թեմային է վերաբերում նաև Ջ. Էշերի <<13 պատճառ՝ ինչու>> գրքի Էկրանավորումը:

Չետագոտության նպատակը

Ուսումնասիրել միջին դպրոցում հոգեբանական բուլինգի դրսևորումը աշակերտ-աշակերտ փոխհարաբերություններում՝ մանկավարժահոգեբանական աշխատանքներն ուղղելով բուլինգի մասնակից երեխաների սոցիալականացման կարողությունների զարգացմանը, ինքնագնահատականի բարձրացմանը:

Չետագոտական հարցը

Արդյոք հնարավոր է միջին դպրոցում պարզել հոգեբանական բուլինգի առկայությունը, նրա դրսևորման ձևերը, գտնել կանխարգելման մեթոդները:

Խնդիրները և մեթոդաբանությունը

- Ուսումնասիրել բուլինգը , նրա առաջացման պատճառները, տեսակները:
- Տեսականորեն բացահայտել բուլինգի հակված միջին դպրոցականների հոգեբանական առանձնահատկությունները:
- Ներկայացնել նրա դրսևորումը միջին դպրոցում:
- Գտնել և կիրառել կանխարգելման միջոցներ խնդրի լուծման համար:

2.1 Ի՞նչ է բուլինգը

Անգլերեն՝ bullying (անգլ. Bully-կռվարար,բռնարար) սահմանվում է որպես ճնշում, խտրականություն, ահաբեկչություն:Եզրույթն առաջին անգամ գործածվել է 1530 թվականից՝ սկզբնապես նշանակելով <<սիրելի>>, իսկ 1710 թվականից ստացել է ներկայիս իմաստը:Առաջինն այս խնդիրն ուսումնասիրել է շվեդ-նորվեգացի հոգեբան Դեն Օլվեուսը, ով 70-ական թվականներին հետազոտություններ անցկացրեց <<Բուլինգ տղաների միջավայրում>> անվանմամբ: Ըստ Օլվեուսի՝ **բուլինգը որևէ երեխայի ուղղված մեկ կամ մի քանի երեխաների երկարատև կանխամտածված հալածանքն է:** Հալածանքը ներառում է ֆիզիկական, հոգեբանական բռնությունը և մեկուսացումը , ընդ որում՝ հալածողի և հալածվողի միջև հարաբերությունները միշտ անհավասար են:Ամեն մի կոնֆլիկտ չէ, որ կարող ենք բուլինգ համարել: Օրինակ, երբ երկու աշակերտ իրար հետ վիճում են, քիչ հետո հաշտվում, դա բուլինգ չէ,բայց եթե երևույթը պարբերական բնույթ է կրում կամ շարունակ կրկնվում է,ապա այն ներկայացնում ենք որպես բուլինգ: Ըստ բուլինգի մասնակիցների քանակի՝ տարբերակում են .

- **Բուն բուլինգ**, երբ բուլերը մեկն է:
- **Սոբինգ**, երբ հետապնդողների քանակը մեկից ավելի է:

Օլվեուսը նկարագրել է, թե ինչպիսի անձնային որակներ են, որոնք որոշ երեխաների կարող են բուլինգի ավելի հավանական թիրախ դարձնել: Դրանք են՝

- Երկչոտություն, անվստահություն
- Չգուշավորություն, մտահոգվածություն, զգայունություն,մեղմություն
- Շփումներից խուսափողականություն, պասիվություն
- Ցածր ինքնագնահատական
- Ընկերների բացակայություն
- Գերպաշտպանվածություն ծնողների կողմից
- Ոչ ագրեսիվություն
- Ֆիզիկական թուլություն

Նշված որոշ որակներ բնածին են (զգացմունքայնություն, ամաչկոտություն, ինքնամոտիվություն), մինչդեռ մյուսները ձևավորվում են երեխայի դաստիարակության ընթացքում: Օլվեուսը տվել է նաև բռնության հակված երեխաների բնութագրիչները՝

- Ազդեսիվ են ուսուցիչների, ծնողների, այլ երեխաների նկատմամբ
- Բռնակող են, դյուրագրգիռ
- Ձգտում են լինել դոմինանտ և ճնշող
- Կարծում են, որ շրջապատող աշխարհը վտանգավոր է
- Չուրկ են կարեկցելու կարողությունից
- Ունեն իրենց ուժը, դիրքը
- Ունեն գերարտահայված դրական կարծիք սեփական անձի մասին
- Տարեկիցներից ֆիզիկապես ուժեղ են (տղաները)
- Տարեկիցների շրջանում միջին կամ միջինից պակաս համակրանք են վայելում:

Նման երեխաները հաճախ մեծանում են ջերմ հուզական փոխհարաբերություններից զուրկ ընտանիքներում: Նրանք կարող են ստանալ լավ կրթություն, բավարար սնունդ, ինամք, սակայն ծնողները բավականաչափ ուշադրություն չդարձնեն երեխաների հուզական և զգացմունքային կարիքների բավարարմանը:

2.2. Բուլինգի տեսակները

Բուլինգը բռնության տեսակ է, որն ունի իր ենթատեսակները.

- **Հոգեբանական (հուզական) բուլինգ**

Բուլերը խոսքով (ծաղր, նվաստացում, սպառնալիք) զոհին հասցնում է հուզական լարվածության և ցածրացնում է նրա ինքնագնահատականը: Հոգեբանական բուլինգն ավելի խորը, տրավմատիկ վերքեր է առաջացնում զոհի մոտ, քան ֆիզիկական ահաբեկումը:

- **Ֆիզիկական բուլինգ**

Չոհի նկատմամբ գործադրվում է ֆիզիկական ուժ, բռնություն (բռնացրով հարվածել, մազերից քաշել, թքել, միտումնավոր կամ կոպիտ շարժումներ կատարել, որոնք կարող են վնասել զոհին):

- **Ֆինանսական բուլինգ**

Սպառնալիքների միջոցով զոհից պահանջում են գումար, խլում են նրա պայուսակը, փչացնում հագուստը, վնասում անձնական իրերը, դիտավորությամբ պատռում են գրքերն ու տետրերը:

- **Չարաբերական կամ սոցիալական բուլինգ**

Անձի մասին վատաբանելը, խմբից վտարելը, հասարակությունից մեկուսացնելը կամ տարանջատելն իրենից ենթադրում է սոցիալական բուլինգ: Բուլինգի այս տեսակը բացահայտ չէ և երկար ժամանակ կարող է մնալ առանց ուշադրության:

- **Կիբեռ բուլինգ**

Բռնության նոր ձև է, որն իր մեջ ներառում է ագրեսիայի արտահայտումը՝ օգտագործելով հաղորդակցման միջոցներ (համակարգիչ, հեռախոս): Էլեկտրոնային հասցեի, սոցիալական կայքերի, չաթերի օգնությամբ հնարավոր է հետապնդել զոհին, նրա մասին անձնական տեղեկություն, բամբասանք և վիրավորանքներ տարածել: Կիբեռ բուլինգի յուրահատկությունն այն է, որ բուլերը գործում է անանուն և իր կատարած քայլերի համար պատասխանատվության չի ենթարկվում: Օրինակ՝ միջին դպրոցի աշակերտները կարող են զոհի մասնակցությամբ որևէ տեսահոլովակ նկարել, դնել այն տարբեր սոցկայքերում՝ դրանով նրան ճնշելով կամ նվաստացնելով:

2.Բուլինգի իրավական կարգավորումները Հայաստանում: Կարգավորման և կանխարգելման միջազգային փորձերը

ՀՀ-ում դեռևս չկան բուլինգի վերաբերյալ օրենքներ կամ դրա հաղթահարմանն ուղղված ռազմավարություններ: Մի շարք իրավական

կարգավորումներ որոշ չափով անդրադառնում են բուլինգի տարբեր դրսևորումների: Դրանք են՝

- ՄԱԿ-ի Երեխայի իրավունքների կոնվենցիան՝ ընդունված 20. 11. 1989թ., Նյու Յորքում ՄԱԿ-ի կողմից՝ վավերացված ԶԶ-ում 22. 07. 1993թ.:
- ԶԶ Սահմանադրության ընդունած << Երեխայի իրավունքների մասին>> ԶԶ օրենքը՝ ընդունված 06.12.2015 թ.:
- <<Հանրակրթության մասին ԶԶ օրենքը>>՝ ընդունված 10.07.2009 թ.:

ԶԶ-ում արդեն իսկ եղած օրենսդրական բազայի և կարիքների գնահատման հիման վրա կարող է ստեղծվել իրավունքների իրացման մեխանիզմների, գործիքների ուղեցույց, որով կառաջնորդվեն դպրոցները: Հայաստանում չկա հստակ վիճակագրություն այն մասին, թե դպրոցում տարեկան քանի երեխա է հասակակցի կողմից բռնության ենթարկվում: Չնայած խնդրի գոյությանը՝ մեր երկրում այն չի դիտարկվում որպես խնդիր:

<<Հայաստանի դպրոցներում հիմնականում ակադեմիական, գիտելիքահեն կրթություն է տրամադրվում, իսկ երեխաների աշխարհայացքի ձևավորման, միջանձնային հարաբերությունների կառուցման, հաղորդակցման հմտությունների ուղղությամբ հանրակրթական դպրոցներում աշխատանքներ չեն տարվում>>,- ասում է Հանրապետական մակավարժահոգեբանական կենտրոնի նախկին տնօրեն, այժմ՝ փոխնախարար Արաքսյա Սվաջյանը:

2016 թվականին բուլինգի թեմայով կատարվել է մի հետազոտություն, ըստ որի՝ մեր երկրում 1-14 տարեկան 10-ը երեխայից 7-ը ենթարկվում է ֆիզիկական կամ հոգեբանական բռնության: Հայաստանի 6 մարզերի մի շարք համայնքներում Վորլդ Վիժնի կողմից 2019 թ. իրականացված հարցումների արդյունքում պարզվել է, որ 12-18 տարեկան երեխաների 8.7%-ը վերջին մեկ տարվա ընթացքում բուլինգի է ենթարկվել, ընդ որում դա ավելի հաճախ եղել է հենց դպրոցում:

Այս համաշխարհային պրոբլեմի դեմ պայքարելու համար ամբողջ աշխարհում մշակվել են հակաբուլինգային ծրագրեր, որոնց արդյունավետությունը դեռևս փորձարկվում են դպրոցներում: Նորվեգիայում այդ ծրագիրը կոչվում է OBPP (Olweus Bullying Prevention Program)՝ մշակված Դեն Օլվեուսի կողմից: Այս ծրագիրը 2 անգամ նվազեցրել է բուլինգը նորվեգական դպրոցներում: Իսպանիայում SAVE ծրագիրը 57% փոխել է ագրեսիաների վարքագիծը, իսկ Իռլանդիայում The Donegal

ծրագիրը 20% վերացրել է բուլինգը: Ռուսաստանում հակաբուլինգային են „Каждый важен” և „Травли нет” ծրագրերը:

ԱՄՆ-ի Ջորջիա նահանգը առաջինն էր, որ ընդունեց բուլինգի կանխարգելման ուղղված օրենք: Օրենքի ընդունման համար խթան հանդիսացավ 1999 թվականին Քոլումբայնում կատարված հրաձգությունը, երբ 2 աշակերտ հրազենով սպանեցին 12 աշակերտի և 1 ուսուցչի: 2005 թ. արդեն 23 նահանգ ընդունել է հակաբուլինգային օրենքներ:



3. Հոգեբանական բուլինգի դրսևորումը միջին դպրոցում

Դպրոցում հանդիպող բուլինգը համաշխարհային խնդիր է, որը կարող է ունենալ վատ հետևանքներ դպրոցական միջավայրի համար և խախտել երեխայի`

ապահով կրթություն ստանալու իրավունքը: Մեզ համար առավել կարևոր է ուսումնասիրել հոգեբանական բուլինգի դրսևորումը միջին դպրոցում, բացահայտել առաջացման հնարավոր պատճառները, գտնել կանխարգելման և կարգավորման բոլոր հնարավոր տարբերակները:

Դպրոցում բուլինգը դրսևորվում է **ուղղակի և անուղղակի** ձևերով՝

- Ուղղակի բուլինգը բնորոշ է տղաներին (հարվածում են, ծեծում, ծաղրում , սպառնում գոհին):
- Անուղղակի բուլինգը՝ աղջիկներին (գոհին կանխամտածված ձևով մեկուսացնում են իրենց միջավայրից):

Դրսևորման այս երկու ձևերն էլ հանգեցնում են աշակերտի ֆիզիկական և հոգեբանական ճնշվածության: Մասնագետները կարծում են, որ դպրոցական միջավայրում բուլինգի կանխարգելմանն ուղղված ծրագրերն առավել արդյունավետ են վաղ տարիքային խմբերում (տարրական և միջին դպրոցում),քանի որ երեխաների հասունանալուն զուգընթաց՝ նվազում է վարքագծի և արժեհամակարգի մեջ դրական փոփոխությունների իրականացման հնարավորությունը: Բուլինգի զոհ դարձածները ձեռք են բերում վախ դպրոցի հանդեպ, համարում են դպրոցը տխուր և անապահով վայր: Ըստ հետազոտության արդյունքների՝ ութերորդ դասարանի ամերիկացի աշակերտների 7%-ը մտում է տանը ամսական մեկ անգամ, քանի որ վախենում է բուլինգի զոհ դառնալուց: Պարզվում է՝ բուլերների 60%-ը 24 տարեկանում գործած է լինում ամենաքիչը մեկ հանցանք:

Կրտսեր և միջին տարիքի դպրոցականները, չունենալով կոնֆլիկտների խաղաղ լուծման հմտություններ, երբեմն վիճում են, հարվածում միմյանց, բայց որոշ ժամանակ անց կարող են համաձայնության գալ: Այն երեխաները, ովքեր ունեն ցածր ինքնագնահատական և ինքնավստահության պակաս,կարող են դառնալ կոնֆլիկտի զոհ:

Իսկ դպրոցում աշակերտները որքանով են ընկալում բուլինգը որպես բացասական երևույթ և ի՞նչն են համարում բուլինգ:Աշակերտների կարծիքով ծաղրը, վիրավորանքը, նվաստացումը, անհավասար վերաբերմունքը, անհարմար դրության մեջ դնելը, սեփական կամքը թելադրելը բուլինգի դրսևորում է:Նրանք ճանաչում և նույնականացնում են բուլինգը, գիտակցում են նրա բացասական հետևանքները, քննադատաբար են վերաբերվում դրան: Աղջիկներն ավելի մեծ հետաքրքրություն են ցուցաբերում այս երևույթի նկատմամբ և ավելի շատ են գիտակցում բուլինգի ծանր

հետևանքները:Նրանք կարող են բռնության ենթարկվել արտաքին տեսքի, ճաշակի և հագուստի համար, և այս ամենը հոգեբանական խորը հետք կարող է թողնել նրանց վրա:Աշակերտների ընկերների քանակը ևս կարևոր է, որովհետև կոնֆլիկտային իրավիճակում հայտնվելիս , երբ շատերն են կանգնում աշակերտի կողքին , բուլինգի իրականացումը ձախողվում է, իսկ երբ աշակերտը ընկերներ չունի , մենակ է, նա դառնում է ավելի խոցելի, օտարվում է խմբից: Ականատես աշակերտները չեն ցանկանում օգնել, չեն շփվում նրա հետ, քանի որ վախենում են նրա կարգավիճակում հայտնվելուց: Հետազոտությունները ցույց են տվել , որ այս աշակերտները կազմում են 30%: Աշակերտների 30%-ը ակտիվ կամ պասիվ ձևով միանում է բուլինգ իրականացնող աշակերտին և սկսում է ծաղրել զոհին՝ նրան իրենցից օտարելով, նրա հետ չշփվելով, նրա կողքին չնստելով: Աշակերտների միայն 40%-ն է, որ ականատես լինելիս միջամտում է: Ըստ վիճակագրության՝ ուսուցիչների շուրջ 40%-ն է, որ բուլինգի դեպքի ականատես լինելիս միջամտում է և հետևողական է լինում,որ այն չկրկնվի, իսկ նրանց 30%–ը միջամտում է,սակայն նրանց չի հաջողվում շտկել իրավիճակը, և լարվածությունն ավելի է խորանում: Շուրջ 20% դեպքերում ուսուցիչները տեղյակ չեն բուլինգի դեպքի մասին: Բուլինգի մասնակիցներին պայմանականորեն բաժանում են 5 խմբերի՝

- **հալածող կամ բուլեր**
- **հալածվող կամ զոհ**
- **հալածողի օգնականներ**
- **զոհի պաշտպաններ**
- **չեզոք մասնակիցներ**

Այժմ փորձենք բացահայտել , թե միջին դպրոցում ինչպե՞ս է բուլինգը դրսևորվում և մասնակիցներից յուրաքանչյուրի վրա ինչ ազդեցություն է ունենում:

3.1 Հոգեբանական բուլինգն աշակերտ-աշակերտ փոխհարաբերություններում: Բռնարար և զոհ

Համաձայն Դեն Օլվեոսի՝ բռնության հանդեպ ուժեղ հակում դրսևորվում է այն երեխաների մոտ, ովքեր սերում են հետևյալ ընտանիքներից՝

- Միայնակ ծնողի կողմից դաստիարակվող երեխան ավելի է հակված հասակակիցներին հուզական բռնության ենթարկելու:
- Ավտորիտար և իշխանատենչ ընտանիքի երեխա:
- Ընտանիք, որտեղ մեծահասակները հաճախ են վիճում երեխաների մոտ: Դրանով նրանք օրինակ են ծառայում, և երեխան այդ ձևը կիրառում է դասընկերների վրա:

Բուլինգ իրականացնողը՝ **բուլերը**, բավականին **ինքնավստահ է, բարձր ինքնագնահատական ունի, խմբում լիդեր է , հարգանք չունի ուրիշի անձի նկատմամբ**: Նրա մոտ կա ընտանեկան անհաջողություններով պայմանավորված տագնապայնություն: Բուլինգ իրականացնող երեխաները իմպուլսիվ են, արագ բռնկվող, նրանց վարքը շրջապատի կողմից վրդովմունքի է արժանանում: Նրանք երջանիկ չեն լինում և ունենում են մեծահասակների աջակցության կարիքը: Այս երեխաներին պատժելը կամ սսեմացնելը որևէ արդյունքի չի հանգեցնի , եթե մենք նրանց չսովորեցնենք վերահսկել սեփական հուզական պոռթկումները, չձևավորենք ապրումակցման կարողություն:

Չոհն ունի ցածր ինքնագնահատական, նրա մոտ գերարտահայտված է տագնապայնության , դժվարությամբ շփման, կոնֆլիկտայնության, ուրիշներից կախվածության մակարդակը: Նա ունի նեգատիվ վերաբերմունք սեփական անձի նկատմամբ, Էմոցիոնալ է, կարող է ֆիզիկապես թույլ լինել, ունենալ արտաքինի հետ կապված որևէ թերություն : Չոհի կարգավիճակում կարող են հայտնվել մեծահասակների պաշտպանության ներքո գտնվող երեխաները: Նրանք կարծում են, որ իրենք չեն կարող պաշտպանել սեփական անձն ու ունեցվածքը, հույսը դնում են մեծահասակների վրա, որոնք մշտապես պաշտպանում են իրենց և հոգում երեխաների բոլոր կարիքները: Արդյունքում չեն ձևավորվում այդ երեխաների ինքնապաշտպանության և պայքարելու կարողությունները, քանի որ նրանք իրենց հույսը դնում են ծնողներ վրա: Չնայած այս ամենի հիմքում ընկած են ծնողական սերն ու հոգատարությունը, սակայն այն երեխայի մոտ ձևավորում է անիքնավստահություն, ցածր ինքնագնահատական, որի արդյունքում նա իր տարեկիցների մոտ իրեն հարմարավետ չի զգում, ընկերներ չունի և խուսափում է բոլորից: Բայց ամենից վատն այն է, որ նման իրավիճակում հայտնված երեխաները կարծում են, որ իրենց նկատմամբ իրականացվող բուլինգն արդարացված է, իրենք արժանի են նման վերաբերմունքի: Քանի դեռ նրանք ոչ միայն կարծում են, որ իրենք

արժանի են դրան, այլև նույնիսկ ծայրահեղ իրավիճակներում չեն կարողանում պաշտպանել իրենց, ապա նրանք բուլերներ կողմից ընտրվելու են որպես թիրախ:

Կա նաև երեխաների մի փոքր խումբ, որոնք թե՛ բուլինգ իրականացնող են, թե՛ բուլինգի թիրախ: Որպես կանոն, նման երեխաները բուլինգի են ենթարկվում իրենցից ավելի ուժեղ տարեկիցների կողմից, և ի պատասխան դրա՝ իրենք էլ հալածում են իրենցից ավելի թույլերին: Բուլինգի մասնակից երեխաների մի տեսակ կա, որին անվանում են քամելեոն: Նա հանգամանքներով պայմանավորված՝ կարող է հանդես գալ և զոհի, և բռնարարի դերերում: Նրա մոտ դրսևորվում է ուժեղ տազնապայնություն, որովհետև նա վախենում է , որ ինքը կարող է հայտնվել զոհի կարգավիճակում և պաշտպանվելու համար սկսում է հարձակվել:

3.2 Բուլինգի օրինակներ սեփական փորձառությունից

Բուլինգը սովորաբար տեղի է ունենում մեծահասակների բացակայության դեպքում, իսկ հալածվող երեխաները ցածր ինքնավստահության պատճառով տեղի ունեցածի մասին մեծահասակներին չեն հայտնում:

Միջին դպրոցում սովորող 2 աշակերտուհի հոգեբանական բուլինգի էին ենթարկում իրենց դասարանում սովորող 2 աղջիկների: Ամեն ինչ կատարվում էր հույժ գաղտնի ձևով, որպեսզի ուսուցիչներից ոչ ոք չիմանա: Ես հայտնվեցի ճիշտ պահին, ճիշտ տեղում և ինձ հաջողվեց բուլինգի ենթարկվող աղջիկներից մեկի հետ զրուցել և հասկանալ՝ ինչ է կատարվում: Սկզբում շատ դժվար էր նրանց բերանից խոսք կորզելը, որովհետև աղջիկները շարունակ լալիս էին՝ գտնվելով հոգեբանական ծանր վիճակում: Նրանց շուրջը պտտվում էր երրորդ աղջիկը, ով փորձում էր ցրել ստեղծված ծանր մթնոլորտը՝ ինձ համոզելով, որ ոչինչ չի պատահել, ամեն ինչ կարգին է: Բռնության ենթարկված աղջիկները մեկը խոստովանեց, որ դասարանից երկու աշակերտուհիներ շարունակ ծաղրում են իրենց և խուսափում են իրենց հետ շփվելուց: Ի դեպ, բուլինգի ենթարկողները մեկն այնքան էլ լավ չէր սովորում, բայց ուներ գեղեցիկ արտաքին, իսկ բուլինգի ենթարկվողները լավ սովորողներ էին, բայց

արտաքնապես խեղճ ու ճնշված տեսք ունեին: Ես պարզեցի, որ այդ դասարան

ուսումնական տարվա սկզբում նոր աշակերտներ էին եկել, որոնցից մեկը ինքնահաստատման փորձեր էր արել, բայց դասարանի լիդեր-աշակերտները նրան հնարավորություն չէին տվել: Դասարանի այն աշակերտները, ովքեր մտերմացել էին Նորեկի հետ, սկսել էին ենթարկվել բուլինգի : Նորեկն այն երրորդ աղջիկն էր, ով ինձ համոզում էր, որ ոչինչ չի պատահել: Ահա այս երկու աղջիկները, մտերմանալով Նորեկի հետ, իրենց կամքին հակառակ օտարվել էին դասարանական կուլտիվից՝ ենթարկվելով հոգեբանական բուլինգի:

Բուլինգի մեկ այլ դրսևորման հանդիպեցի մի ուրիշ դասարանում, որտեղ ֆինանսապես բավականին ապահով ընտանիքի երեխան, ով խելացի էր ու դասարանում հեղինակություն էր վայելում, բուլինգի էր ենթարկում դասարանի մյուս տղաներին: Նա բացահայտ ցույց էր տալիս, որ ինքն առավել է մյուսներից, կարող է վիրավորել, հարվածել, որովհետև ինքը դրա իրավունքն ունի: Սկզբում որպես դիտող՝ ես նկատեցի, որ դասարանի տղաները վախենում են նրանից: Դասարանում որևէ միջադեպ առաջանալիս հանգուցալուծումը տրվելու էր բռնարարի առջև զոհի ներողություն խնդրելով կամ նրա կողմից զոհին հարվածներ հասցնելով: Իմ այն հարցին, թե ինչու՞ պիտի մյուսները կատարեն քո հրամանները, քեզից ներողություն խնդրեն, իսկ դու՝ ոչ, նա պատասխանեց, որ ինքը չի վախենում ոչևչից, որովհետև ,միևնույնն է, իրեն ոչ մեկը չի պատժելու՝ անգամ եթե ինքն է մեղավոր:

Կատարված դեպքերը ես դիտարկել եմ որպես հոգեբանական բուլինգ և անմիջապես հայտնել դասղեկներին, որպեսզի նրանք դասարանում բուլինգը կանխելու համար համապատասխան աշխատանքներ տանեն իրենց աշակերտների հետ:

Իսկ ինչպե՞ս հասկանալ, որ երեխան բուլինգի զոհ է դարձել: Մենք նրա վարքագծում ակնհայտ փոփոխություններ կնկատենք, եթե հետևողական լինենք : Ենթարկվելով բուլինգի՝ երեխան դառնում է տխուր, ինքնամիտ, ընտանիքում ագրեսիվ վարք է դրսևորում, լռում է և ծնողին ոչինչ չի ասում իր նկատմամբ գործադրվող բռնության վերաբերյալ: Շատ դեպքերում երեխան լռում է, որովհետև կարծում է, որ ծնողի միջամտությունն արդյունավետ չէ և իրավիճակն ավելի կարող է բարդացնել: Ցավալին այն է, որ երբ բուլինգ իրականացնող երեխայի ծնողին են հայտնում այդ մասին, նա կամ ուսուցչին է մեղադրում, արժեզրկում, կասկածի տակ դնում նրա գիտելիքները կամ խոստովանում է, որ երեխան տանն էլ խնդիրներ ունի , և ծնողն ինքն էլ չի կարող այդ հարցին լուծում տալ: Ուրեմն ծնողը պիտի ուշադիր լինի երեխայի նկատմամբ, պարզի, թե ինչու՞ է դադարել ընկերների հետ շփվել,

ինչու՞ չի ցանկանում դպրոց գնալ, ինչու՞ է տուն վերադառնալիս ընտրում դժվարամատչելի ճանապարհներ և այլն: Օրինակ՝ իմ պրակտիկայում հանդիպել է յոթերորդ դասարանում սովորող մի աղջիկ, ով տուն գնալիս կարճ ճանապարհի փոխարեն ընտրել էր երկար ճանապարհը: Պատճառն այն էր, որ ծնողը պահանջել էր դասերից հետո անմիջապես տուն վերադառնալ, քանի որ աղջիկը վարքագծային խնդիրներ ուներ և սեռահասունացման հետ կապված՝ ձգտում էր շփվել միայն տղաների հետ, սակայն նրանց կողմից ենթարկվում էր ծաղրի:

Հաճախ պատահում է , որ ծաղրի է ենթարկվում այն աշակերտը, ով դասին միշտ պատրաստ է:Նրա նկատմամբ բուլինգի դրսևորման ձև է <<գիրք կրծող>>, <<կավիճ կրծող>> արտահայտությունների գործածությունը:Փորձը ցույց է տվել, որ կրտսեր դպրոցում լավ սովորող տղաները միջին դպրոցի վերջում կորցնում են ուսման նկատմամբ հետաքրքրությունը, որովհետև վախենում են դասընկերների ծաղրից: Չարմանալին այն է, որ ցածր (IQ) ինտելեկտի գործակից ունեցող աշակերտները ծաղրում և ահաբեկում են իրենցից լավ սովորող դասընկերներին: Այսպիսի բուլերները ձգտում են ֆիզիկական միջոցներով ծածկել այն, ինչին չեն կարող հասնել իրենց խելքով:




Բուլինգը բացասական հետևանք է թողնում ոչ միայն զոհի վրա, այլև ազդեցորի, որովհետև նրա մեջ ծնվող ազդեցիկան հետագայում դառնում է կայուն վարքագիծ:

Չետագոտությունները ցույց են տվել, որ ժամանակի ընթացքում բուլինգի բռնարար-գոհ դերերը կարող են փոխվել: Չոհը հետագայում ինքը կարող է դառնալ բռնարար կյանքի տարբեր ոլորտներում՝ աշխատավայր, ընտանիք և այլն: Այս երևույթը կարող ենք կապել Սթիվեն Կարպմանի <<Ճակատագրի եռանկյունի>> տրանսակցիոն վերլուծության հետ, որում կան 3 հոգեբանական դերեր՝

- Գործող անձ, ով խաղում է զոհի դեր (victim):Նա ունի ճնշված, տանջված, մշտապես հետապնդող դեր:
- Գործող անձ, ով ճնշում, պարտադրում կամ հետապնդում է զոհին (persecutor)
- Փրկարար (rescuer) , ով գալիս է օգնության զոհին, ցանկություն ունի փրկել իրավիճակը կամ թույլի:

Ստեղծվում է մի իրավիճակ, որտեղ աշակերտը սկսում է խաղալ զոհի կամ հետապնդողի դեր: Այդ ժամանակ մյուս աշակերտները վերցնում են այլ դերեր: Այնուհետև «2 խաղացողներ տեղափոխվում են եռանկյունով, այդպիսով տեղի է ունենում անցում մի դերից մյուսը»: Օրինակ, զոհը փոխակերպվում է փրկարարի, փրկարարը՝ հետապնդողի կամ, ինչպես հաճախ պատահում է, փրկարարը փորձում է դուրս գալ իրավիճակից և հայտնվում է զոհի դերում: <<Յուրաքանչյուր խաղացողի գաղտնի նպատակն ու իրավիճակում գտնվելն այն է, որ յուրաքանչյուրը բավարարում է իր չարտահայտած (երբեմն անգիտակցական) հոգեբանական ցանկությունները, պահանջմունքները այնպես, ինչպես թույլատրելի է համարում: Այդպիսով , յուրաքանչյուր խաղացող հանդես է գալիս՝ ելնելով իր սեփական կարիքներից և ոչ թե իրական պատասխանատվությունից և այլասիրությունից>>:



Բուլինգի պրոցեսում ի՞նչ վարքագիծ են դրսևորում դասարանի մյուս աշակերտները:

- Բուլերի օգնականները դասարանում այնքան էլ հարգված չեն, նրանք ենթարկվում են բուլերին, որովհետև վերջինս պլանավորում է , ընտրում զոհին, իսկ իրենք ծաղրում են կամ հարվածում նրան: Նրանց ինքնագնահատականը միջին է:
- Բարձր ինքնագնահատական ունեն զոհի պաշտպանները, ովքեր հուսալի են, բարի և այդ բարությանը էլ ապրումակցում են զոհին և օգնում նրան:
- Չեզոք մասնակիցները սոցիալական հարաբերություններում բավականին անկախ են, ինչը նրանց թույլ է տալիս ընդհանրապես չխառնվել կոնֆլիկտին: Նրանք ոչ մեկի ազդեցության տակ չեն ընկնում և հանդես են գալիս դիտորդի դերում: Շատ դեպքերում դա նորմալ չէ, որովհետև նրանք դառնում են հանդիսատես, ովքեր դիտում են բուլինգի երևույթն իբրև ներկայացում:

3.3 Հոգեբանական բուլինգն ուսուցիչ-աշակերտ փոխհարաբերություններում

Միջին դպրոցում աշակերտը կարող է բուլինգի ենթարկվել ոչ միայն դասընկերների, այլև ուսուցչի կողմից: Օրինակ կան այնպիսի երեխաներ, ովքեր ինքնամոխի են, անհամարձակ, իսկ ուսուցիչն իր ինդիքը չի համարում բացահայտել նրանց ամբողջական կարողությունները: Երեխայի դանդաղ մտածելու կամ խոսելու պատճառով անհանդուրժող և անհամբեր ուսուցիչը կարող է նրան դիտորդություն անել, շտապեցնել, և երեխան որպես կանոն՝ այդ ուսուցչի դասին այլևս չի ցանկանա խոսել, իր իմացածն արտահայտել: Դասարանն աշակերտի կյանքում շատ կարևոր խումբ է, և նա չի ցանկանում , որ իր դասընկերները տեսնեն, թե ինչպես է ուսուցիչն իրեն ծաղրում կամ նվաստացնում: Երբ ուսուցիչն անհարգալից է վերաբերվում որևէ աշակերտի, ապա մյուս աշակերտները դառնում են բուլինգի պասիվ մասնակիցներ: Նրանք սկսում են խուսափել այդ աշակերտից, նրա հետ վարվում են այնպես, ինչպես ուսուցիչն է վարվել և ցույց են տալիս, որ այդ աշակերտը կորցրել է իր դիրքը դասարանում:

Հետաքրքրական է նաև ուսուցիչ-աշակերտ հարաբերություններում բուլինգի դրսևորման մի ձև, որ վերջերս է տարածում գտել մեր դպրոցներում: Ուսուցիչը ընդգծված դրական վերաբերմունք է ցույց տալիս այն աշակերտի նկատմամբ, ով իր մոտ լրացուցիչ պարապում է: Եվ հակառակը՝ բացասական վերաբերմունք է դրսևորում այն աշակերտի հանդեպ, ով իր մոտ չի պարապում կամ պարապում է ուրիշ ուսուցչի մոտ: Նա աչքի տակ է վերցնում այդ աշակերտին և նրան սկսում է բուլինգի ենթարկել: Հաճախ ուսուցիչներն իրենց անձնային,

հոգեբանական, ընտանեկան և աշխատանքային խնդիրները տեղափոխում են դպրոց՝ առաջացնելով լարված փոխհարաբերություններ մեկ կամ մի քանի աշակերտների կամ ամբողջ դասարանի հետ: Ուսուցիչը կարող է աննրբանկատորեն ամբողջ դասարանի ներկայությամբ աշակերտին դնել անհարմար իրավիճակի մեջ՝ նրան անձնական թեմայով դիտողություն անելով, նրա նկատմամբ ֆիզիկական կամ խոսքային բռնություն գործադրելով: Ուսուցիչը երբեմն դրական և հարգալից է այն աշակերտի հանդեպ, ում ուսումնական կարողություններն ու առաջադիմությունը գերազանց են կամ սոցիալական կարգավիճակը և ընտանիքի ֆինանսական դրությունն ավելի բարձր է: Հետևաբար աշակերտները գիտակցում են խտրական վերաբերմունքի և իրենց կամ դասընկերոջը բուլինգի ենթարկելու պատճառները:

Բուլինգի մասին խոսելիս մենք անմիջապես պատկերացնում ենք զոհի կարգավիճակում գտնվող աշակերտի: Իրականում բուլինգի զոհ կարող է դառնալ նաև ուսուցիչը: Նման երևույթի կարելի է հանդիպել բարձր դասարաններում, երբ աշակերտները, թիրախավորելով կոնկրետ ուսուցչի, տապալում են նրա դասը: Հետաքրքիրն այն է, որ միևնույն աշակերտները կարող են բուլինգի ենթարկել մի ուսուցչի և բոլորովին այլ, հանգիստ վարք դրսևորել մեկ այլ ուսուցչի դասի ընթացքում: Այս ամենը խորը հոգեբանական հիմքեր ունի, և պատճառները պիտի փնտրել ուսուցչի մասնագիտական հմտությունների, դասապրոցեսի կազմակերպման և աշակերտի հետ վարվելաձևի մեջ: Աշակերտները կարող են նաև ուսուցչին բուլինգի ենթարկել՝ նրա դասավանդած առարկան համարելով ոչ այնքան կարևոր իրենց համար :

3.4 Ի՞նչ դեր ունի ծնողը բուլինգի գործընթացում

Դպրոցական միջավայրը բուլինգից զերծ պահելու համար անհրաժեշտ է աշխատել ոչ միայն ուսուցիչների, այլև ծնողների հետ : Նրանք պարտավոր են ուշադիր լինել և աչք չփակել իրենց երեխաների այն արարքների վրա, որոնք կարող են ճակատագրական լինել մեկ այլ երեխայի համար: Այն ծնողները, ովքեր կարծում են, որ իրենց երեխան ,իր հարցերն ինքնուրույն լուծելով, հմտություն է ձեռք բերում ողջ կյանքի համար՝ դրսևորելով բռնարարի դեր, նրանք սխալվում են , որովհետև այդ վարքագիծը հետագայում վերափոխվելու է բնավորության՝ դառնալով պատուհաս հասարակության համար: Երբ ծնողը փոքր տարիքում մեծարում է երեխային, նրա մեջ ծնում է մեծամտություն՝ փակելով երեխայի աչքերը

իրականության առաջ : Երեխան կարծում է , որ ինքն ավելի մեծ արտոնությունների կամ գիշումների է արժանի, քան մնացածները:

Ծնողի վարքը կարևոր է երեխայի համար այնքանով, որ որոշակի տարիքում (6-10 տարեկան) երեխան ընդօրինակում է ծնողին, որդեգրում է նրա մոտեցումները, մտքերը ` նմանվելով նրան:

Չաճախ բուլինգի ենթարկված երեխայի ծնողն անզոր է լինում, մեղավորության զգացում է ունենում երեխայի նկատմամբ: Երեխային օգնելու համար ծնողը երբեմն սկսում է մեղքը բարդել նրա վրա` ասելով <<Դու ես մեղավոր>>, <<Դու թույլ ես>>, <<Ինչու՞ դու ել նրա նման չխոսեցիր>> արտահայտությունները` չգիտակցելով, որ դրանով նա ավելի է խորացնում երեխայի հոգում առաջացած անդունդը: Փոխարենը ծնողը պիտի երեխային ասի, որ ինքը հավատում է նրա ուժերին, ցավում է պատահածի համար , որ դա նրա մեղքով չի եղել, լավ է, որ այդ մասին ինքը գիտի և միասին կհաղթահարեն : Այսպես երեխան կզգա, որ պաշտպանված է , մենակ չէ և ճիշտ է արել, որ հայտնել է ծնողին: Ուրեմն ծնողն ունի մեծ պատասխանատվություն երեխայի անձի ձևավորման համար:

<<Դաստիարակելով երեխաներին ` ծնողները դաստիարակում են մեր երկրի ապագան, իսկ դա նշանակում է` նաև ամբողջ աշխարհի պատմությունը>>: Ա.Ս.Մակարենկո

4. Գործնական մաս



4.1 Չրույցի մեթոդ: Հոգեբանական թեստ

Գործնական մասի համար ես ութերորդ դասարանում վարել եմ դաս «Բուլինգ» թեմայով, պարզել, թե աշակերտները որքանով են տեղյակ այդ երևույթի մասին: Ես նրանց ներկայացրել եմ, թե ինչ է իրենից ներկայացնում բուլինգը, որոնք են նրա տեսակները, ովքեր կարող են դառնալ բուլինգի զոհ, բուլեր, բացատրել, թե ինչ մեթոդներով պիտի կանխել այն: Աշակերտները համակ ուշադրությամբ լսել են ինձ, տվել իրենց հուզող հարցերը՝ ստանալով սպառնիչ պատասխաններ: Չրույցի մեթոդը կիրառելուց հետո ես անցել եմ գործնական մասին՝ աշակերտներին բաժանելով իմ կողմից կազմած հոգեբանական թեստը: Թեստի հարցերը և տարբերակները հավաքված էին Օլվեուսի հարցադրումների հիման վրա՝ իմ կողմից ենթարկվելով որոշակի փոփոխությունների: Ստորև ներկայացնում եմ թեստը

Հոգեբանական թեստ

1. Դասարանում ես շատ ընկերներ ունեմ

- Այո, ես շփվում եմ բոլորի հետ
- Շփվում եմ մի երկուսի հետ
- Ոչ, ես ոչ մեկի հետ չեմ շփվում

- Ես կուզեմ քու բոլորի հետ շփվել

2. Ինձ համար կարևոր է ընկերոջս արտաքինը

- Այո
- Ոչ
- Իհարկե, եթե նա գեղեցիկ չէ, ուրեմն ոչ մի լավ բանի արժանի չէ

3. Ես կարծում եմ, որ իմ դասընկերներն ինձնից ավելի լավն են

- այո
- երբեմն
- մենք բոլորս հավասար ենք

4. Մեր դասարանը շատ համերաշխ է

- Այո
- Մենք շատ քիչ ենք շփվում
- Ոչ, համերաշխ չէ

5. Ես հաճախ եմ ունենում վախի և տագնապի զգացում

- Այո
- Ոչ
- Երբեմն

6. Երբ ինձ մոտ նեղացնում են դասընկերոջս,

- Ոչինչ չեմ անում, նա արժանի է
- Չեմ խառնվում, որովհետև դա ինձ չի վերաբերում
- Պաշտպանում եմ նրան

7. Ինձ թվում է՝ դասընկերներս ինձ հետ չեն ուզում շփվել

- Ոչ ինձ հետ բոլորը շփվում են
- Ես ինքս չեմ ուզում նրանց հետ շփվել
- Այո, ինձ հետ չեն շփվում

8. Մեր դասարանում կան աշակերտներ, որոնց ենթարկվում են մյուսները

- Ոչ, չկան

- Այո, կան
- Ես նրանցից մեկն եմ

9. Ես կարծում եմ՝ ուժի միջոցով կարելի է լուծել խնդիրները

- Այո, դա միակ տարբերակն է
- Ոչ, պիտի խաղաղ ճանապարհով լուծել
- Երբեմն առանց դրա հնարավոր չէ

10. Մեր դասարանում կա մեկը, ում հետ չեն շփվում

- Ոչ, չկան
- Այո, կան
- Ես նրանցից մեկն եմ

11. Մեր դասարանում կա ծաղր, նվաստացում

- Այո, միշտ վեճեր և կռիվներ են
- Ոչ, չկա
- Երբեմն լինում են

12. Իմ կարծիքով ուսուցիչները ստորացնում են աշակերտներին

- Այո
- Ոչ
- Երբեմն

13. Մեր դասարանում կան աշակերտներ, ովքեր ծաղրում են, նվաստացնում ուսուցչին

- Ոչ, չկան
- Այո, կան

14. Եթե ինձ մոտ ստորացնեն դասընկերոջս

- Ես էլ նրանց կմիանամ
- Կպաշտպանեմ նրան
- Ոչինչ չեմ անի, դա ինձ չի վերաբերում

14. Ես ունեմ դասընկերներիս աջակցության կարիքը

- Այո
- Ոչ
- Երբեմն

15. Ես կարծում եմ, որ իրավունք ունեմ ճնշել նրան, ում չեմ սիրում

- Այո, իհարկե
- Ոչ, համաձայն չեմ

16. Ես չեմ օգնում բռնության ենթարկվող դասընկերոջս, որովհետև

- Վախենում եմ, որ ինձ նույնպես կսեղացնեն
- Չեմ վախենում և օգնում եմ

17. Ես կարծում եմ, որ այս երևույթի մասին պետք չէ մեծահասակներին տեղեկացնել

- Այո, համաձայն եմ
- Ոչ, պիտի նրանց անպայման ասել


18. Ըստ իս՝ բուլինգ իրականացնողը պիտի պատժվի

- Այո
- Ոչ
- Երևի

19. Եթե մեր դասարանը նավով ճամփորդեր, ես կլինեի

- Նավապետ
- Նավապետի օգնական
- Նավաստի

20. Ինչ եմ հասկանում ես՝ բուլինգ ասելով



Ներքևում պատկերված աղյուսակում հակիրճ ներկայացրել եմ թեստի հարցադրումներից 10-ի պատասխանները.


Դասարանը համերաշխ է	21 այո	6 ոչ	
Տազնապի և վախի զգացում ունի	3 այո	19 ոչ	9 երբեմն
Երբ իր մոտ նեղացնում են դասընկերոջը	23 պաշտպանում է	6 չի խառնվում	

Դասարանում կա աշակերտ, ում ենթարկվում են մյուսները	12 այո	18 ոչ	
Խնդիրները պիտի լուծել ուժի միջոցով	3 այո	13 ոչ	14 երբեմն
Դասարանում կա ծաղր և նվաստացում	3 այո	16 ոչ	11 երբեմն
Ուսուցիչը ստորացնում է աշակերտներին	2 այո	8 ոչ	20 երբեմն
Ունի դասընկերոջ աջակցության կարիքը	3 այո	9 ոչ	18 երբեմն
Չի օգնում զոհին, որովհետև վախենում է	1 աշակերտ վախենում է	29 աշակերտ չի վախենում և օգնում է	
Երևույթի մասին պետք է մեծերին տեղեկացնել	15 այո	15 ոչ	

Ուսումնասիրելով լրացված թեստերի պատասխանները՝ ես կազմել եմ դիագրամա ութերորդ դասարանում բուլինգի երևույթի դրսևորման վերաբերյալ

- Պոտենցիալ բուլեր 9%

- Չնհ 10%
- Չնհի օգնական 23%
- Չեզոք մասնակիցներ 59%



Եզրակացություն

Համաշխարհային խնդիր դարձած այս երևույթն օր օրի ավելի է մեծանում: Միայն համակողմանի, ներդաշնակ աշխատանքի, երևույթի նկատմամբ շատ մեծ ուշադրության, նրա կանխարգելմանն ուղղված մանկավարժական և հոգեբանական ծրագրերի կիրառման դեպքում կարելի է արմատախիլ անել բռնությունը դպրոցում: Որպես դպրոցական կոլեկտիվում բուն դրած << ախտ >>՝ բուլինգը պիտի <<բուժել>> ոչ միայն զոհի մոտ, այլ կոլեկտիվի , որովհետև այն բոլորի խնդիրն է : Պիտի դպրոցական ողջ կոլեկտիվը՝ ուսուցիչ, տնօրեն, հոգեբան, ծնող, դասարան նպատակամղված գործի անցնեն երևույթը դպրոցում իսպառ բացառելու համար: Բռնությունից դեպի մարդասիրություն սահուն անցում կատարելու համար պիտի գործի դրվի **Էմպատիայի, նույնականացման և ռեֆլեքսիայի** մեթոդները: Մեթոդների ճիշտ կիրառման արդյունքում մենք բուլինգի ենթարկող աշակերտի մոտ կզարգացնենք ինքնաճանաչողության և սոցիալական կարողունակությունը: Նա իրավիճակին կնայի դիմացինի աչքերով, կճանաչի նրա հույզերն ու զգացմունքները, կկարեկցի, կսկսի վերլուծել սեփական ցանկությունները, արարքները և դրանց հետևանքները:

Ըստ իմ կատարած հետազոտությունների արդյունքների՝ ես հանգեցի եզրակացության, որ բուլինգի տեսակներից դպրոցում առավել տարածված է հոգեբանական բուլինգը, որը դրսևորվում է միաժամանակ և աշակերտ-աշակերտ, և աշակերտ-ուսուցիչ փոխհարաբերություններում: Երևույթը կանխելու համար ես առաջարկում եմ կիրառել հետևյալ միջոցառումները.

1. Կազմակերպել իրազեկիչ հանդիպումներ , որոնց ընթացքում աշակերտները մանրամասն կծանոթանան երևույթին:
2. Աշակերտներին ներկայացնել իրենց իրավունքները, կարդալ այդ իրավունքները պաշտպանող օրենքները:
3. Անհատական զրույց ունենալ բուլինգի մասնակիցների հետ, լսել նրանց առանձին-առանձին:
4. Տեղեկացնել կրթական հաստատության բոլոր ներառված օղակներին իրավիճակի մասին:
5. Կազմել միասնական աշխատանքային պլան՝ բոլոր օղակների ներգրավվածությամբ:

6. Ապահովել ուսուցիչների և ծնողների համագործակցությունը: Աշակերտների հետ վարել զրույցներ տարբեր հոգեբանական թեմաներով, հետաքրքրվել նրանց նախասիրություններով և զգացմունքներով:
7. Տարվա մեջ մի քանի անգամ կազմակերպել անանուն, սոցիոլոգիական հարցումներ՝ դպրոցում տեղադրելով արկղ, որտեղ աշակերտները կզցեն իրենց անանուն գրառումները:

Դպրոցը պիտի դառնա ապահով և անվտանգ միջավայր բոլորի համար՝ ձևավորելով առողջ հարաբերություններ և մանկավարժական, և աշակերտական կոլեկտիվներում:

Այն միջավայրում, ուր տիրում է առողջ մթնոլորտ, կդաստիարակվի ինքնավստահ, կամային բարձր որակներ ունեցող, հավասարակշռված և ուժեղ հոգեբանությամբ աշակերտ, ով հասարակության համար հետագայում կդառնա ոչ թե պատուհաս, այլ՝ պիտանի մարդ:

Գրականություն

Վորլդ Վիժն Հայաստանի <<Նավակ>> երեխայի և ընտանիքի զարգացման կենտրոն՝
<<Անվտանգ և բարենպաստ միջավայրի ապահովումը դպրոցներում>>

Մ.Միրայելյան <<Բռնության և զոհի ոգեբանություն>> Երևան, 2016 Վիքիպեդիա

О. Глазман Психологические особенности участников буллинга

Olweus D. Bullying at school: What we know and what we can do. Malden , MA:
Blackwell Publishing (1993)

Կայքեր՝

<https://www.arlis.am/documentview.aspx?docID=143703>

<https://www.aravot.am/2021/11/19/1230314/>

<https://www.unicef.org/armenia>

<https://media.foxford.ru/articles/shkolnyy-bullying>

<https://mors.center/chto-takoe-bullying>

<https://krtaditak.am/12->

[%D6%85%D5%A3%D5%BF%D5%A1%D5%AF%D5%A1%D6%80-](https://krtaditak.am/12-%D6%85%D5%A3%D5%BF%D5%A1%D5%AF%D5%A1%D6%80-)

[%D5%B4%D5%AB%D5%BF%D6%84-](https://krtaditak.am/12-%D5%B4%D5%AB%D5%BF%D6%84-)

[%D5%A5%D6%80%D5%A5%D5%AD%D5%A1%D5%B6%D5%A5%D6%80%D5%AB-](https://krtaditak.am/12-%D5%A5%D6%80%D5%A5%D5%AD%D5%A1%D5%B6%D5%A5%D6%80%D5%AB-)

[%D5%B4%D5%A1%D5%BD%D5%AB%D5%B6/](https://krtaditak.am/12-%D5%B4%D5%A1%D5%BD%D5%AB%D5%B6/)

<https://hy.wikipedia.org/wiki/%D4%BF%D5%A1%D6%80%D5%BA%D5%B4%D5%A1>

[_%D5%A5%D5%BC%D5%A1%D5%B6%D5%AF%D5%B5%D5%B](https://hy.wikipedia.org/wiki/%D4%BF%D5%A1%D6%80%D5%BA%D5%B4%D5%A1%D5%B6%D5%AB_%D5%A5%D5%BC%D5%A1%D5%B6%D5%AF%D5%B5%D5%B)

[8%D6%82%D5%B6%D5%AB](https://hy.wikipedia.org/wiki/%D4%BF%D5%A1%D6%80%D5%BA%D5%B4%D5%A1%D5%B6%D5%AB_8%D6%82%D5%B6%D5%AB)

